

Аллоҳга қасамки, Маймуна кетди



11:06 / 11.03.2020 2953

Маймуна бинти Ҳорис онамизнинг ва у кишининг опа-сингилларининг иймонлари бақувват эканига Пайғамбар соллаллоху алайҳи васалламнинг ўзлари гувоҳлик берганлар.

Имом Насайй ва бошқалар Абдуллоҳ ибн Масъуд розияллоху анҳудан қилған ривоятда Набий соллаллоху алайҳи васаллам Маймуна бинти Ҳорис онамиз, Умму Фазл, Асмо бинти Умайс ва Салма бинти Умайс розияллоху анҳолар ҳақида:

«Мўмина опа-сингиллар», деганлар.

Оиша онамиз розияллоху анҳо Маймуна бинти Ҳорис онамизнинг мўминларнинг оналари ичida энг тақводор ва силаи раҳмга мойил эканликларига гувоҳлик бериб:

«Аллоҳга қасамки, Маймуна кетди. Албатта, у ичимиизда энг Аллоҳга тақводоримиз ва силаи раҳмга мойилимиз эди», дейдилар.

Маймуна бинти Ҳорис онамиз ҳадис ривоят қилишда Оиша онамиз ва Умму Салама онамиз розияллоху анҳолардан кейин, учинчи ўринда турад әдилар.

Хазрати Маймуна розияллоху анҳо Расули Акрам соллаллоху алайҳи васалламдан 76та ҳадиси шариф ривоят қилдилар. Шулардан биттасига имом Бухорий ва бештасига имом Муслим якка ҳолда, еттитасига биргаликда иттифоқ қилғанлар.

Маймуна онамиздан опа-сингилларининг ўғиллари: Абдуллоҳ ибн Аббос, Язийд ибн Мадад ибн ал-Ҳадд, Абдурроҳман ибн ас-Саиб ал-Ҳуламий, Язийд ибн ал-Асом ва Убайдуллоҳ ал-Жавланий, Сулаймон ибн Ясор, Иброҳим ибн Абдуллоҳ ибн Маъбад, Ибн Аббоснинг мавлоси Курайб, Убайда ибн ас-Сибоқ ва Олия бинту Сабийъ ва бошқалар ривоят қилдилар.

«Ҳадис ва ҳаёт» китобидан